

Almanac de Interlingua

Numero 28 – Martio 2012

Editor: Cláudio Rinaldi (almanacdeinterlingua@yahoo.com.br)

Nulle salvation extra FIFA?

Recentemente un crise politic ha misse in dubita le honestitate del integrantes del Federation International de Football Association. Inter le eventos suspiciose es le attribution a Russia e Qatar del mundiales 2018 e 2022, respectivamente, e le reelection del presidente Sepp Blatter pro su quarte termino consecutive – su adversario unic habeva le candidatura bannite per le entitate. FIFA dissatisface multe fans anque per su insistencia in prohiber tote technologia e in conservar intacte alcun regulas obsolete – il suffice un comparison con le futsal e le beach soccer, con lor stylos ben plus dynamic.

Ci on non debattera iste questiones. Le corruption ja ha essite appreciate per le media britannic e le policia suisse, durante que le themas sportive se discute a exhaustion inter le fans e le jornalistas. In iste edition, on se propone a monstrar le football jocate extra le autoritate del senior Blatter.

Ben que poco mentionate in le medios de communication, le football “non-FIFA” ha su selectiones national e su mundiales tamben. Le Insulas Feroe, que hodie es membro plen de FIFA, ganiava visibilitate al albergar e vincer le prime torneo de football intra le Jocos Insular, in 1989. Iste competition polysportive se ha disputate biennialmente e reuniva in su ultime edition vinti-quatro participantes in le Insula Wight.



Sigillo celebrante le prime apparition del football in le Jocos Insular in 1989, in le Insulas Feroe. Le proxime edition del evento essera in 2013 in le archipelago del Bermudas.

Totevia, altere selectiones non ha habite le sorte del Feroe, mesmo representante statos soveran o regiones autonome o ethnic ben definite. Al fin del 1980s, FIFA pareva ben disposite a acceptar nationes dependente o sin un liga proprie. Assi se includeva Aruba, un dependentia nederlandese, e Liechtenstein, cuje clubs integra le liga suisse. Ma le grande quantitate de requisitiones duceva le entitate a suspender su decision e stablir regulas plus stricte, como le obligation de un liga proprie e un stadio pro matches del selection national.

Iste reconsideration face que equipas in situation identic sia tractate de maniera distincte. Assi, Catalonia, Gibraltar e Zanzibar continua sin permission pro integrar FIFA. In ultra, nove concessiones como le inclusion de Palestina in 1998 e de Nove

Caledonia in 2004 crea ancora plus incoherentia, ja que altere populos sin un stato proprie desira tamen concurrer a vacantias in le competitiones official. Vinti-tres membros de FIFA non es statos independente, ci incluse le quatro selectiones representante Grande Britannia. Le resentimento verso le privilegio concesse al nationes britannic veni de longe tempore. Le irregularitate le plus evidente passava in le Pais de Galles, que ganiava directo a un selection national ma ni al minus haveva un campionato pro su clubs. A fin de ablandar le pression, le galleses ha organisate lor liga ab 1992. Totevia, ni tote le clubs adhereva, e plures ancora pertine al divisiones anglese – Swansea City ha mesmo ascense al Premier League iste saison. Pais independente ma con recognition international limitate es anque in situation diverse – durante que Taiwan es acceptate, Kosovo non lo es.

Le caso de Groenlandia es particularmente intrigante, perque il ha nulle argumento que lo face differente del Insulas Feroe – ambes es dependentias danese con population simile, autonomia administrative e cultura proprie. Totevia, FIFA exige que su membros dispone de un stadio permanente a fin que le selection national realisa su jocos, un demanda que le insula arctic non pote complir perque su climate non supporta le herba. De tote modo, FIFA se ha monstrate receptive al idea de que un campo artificial sia usate in Groenlandia, permettente alora su adhesion. Durante que illo non se concretisa, Groenlandia – ubi actua plus que cinquanta clubs – seque disputante su matches per entitates parallel.



Le prime match amical del selection tibetan, contra Groenlandia, esseva registrate in un film documentari appellate *Le equipa prohibite*. Le jogadores se preparava in India e viaggiava a Copenhagen, ubi le match haveva loco ante un audientia de 5 mille personas e un menacia de embargo chinese al cambaros de Danmark. Le supernomine “Le Prohibitos” deveniva popular, e ab tunc le tibetanos prendeva parte in le coppas ELF e FIFI in 2006. Le equipa non poteva participar del mundial VIVA in 2010 per questiones financiari, ma expecta obtener le 55 mille dollars previste pro coperir su participation in 2012.

In 2003, le advocato belge Luc Misson fundava le Nouvelle Fédération-Board con le scopo de dar plus libertate al jogadores professional e provider plus divulgation al equipas inofficial. Secundo su philosophia, tote le populos ha directo a disputar matches international con un equipa proprie, mesmo si illo non es affiliate con FIFA.






In 2005, le NF-Board organisava un torneo pro celebrar le 50^e anniversario del federation de football de Cypro del Nord, pais independente de facto ma sin recognition per le Naciones Unite. Le equipa hospital deveniva campion con victorias sur Laponia e Kosovo. Date le successo del evento, le NF-Board planava realisar anque la su prime mundial le anno sequente. Non obstante, un cambio de governmento duceva a un disaccordo financiari e le pais mediterranee decideva organiser su proprie torneo, appellate Cuppa Mundial ELF. Attracte per le patrocinio nordcyprie, octo equipas se inscribeva, representante sex membros de NF-Board e duo de FIFA. Cypro del Nord vinceva 3-1 le final contra Crimea.

Anque in 2006 le club hamburgese St. Pauli profitava le Cuppa Mundial FIFA in Germania pro realisar un evento parallel e cercar publicitate al equipas excluse. Le FIFI Wild Cup se declarava un cuppa footballistic alternative e lo disputava sex equipas. Lo vinceva anque Cypro del Nord, que in le final batteva Zanzibar per penalties post un 0-0 al tempore regular. Extra campo, tamen, le organisation debeva pugnare contra le resistentia de FIFA, que allegava le derecho de cancellar le torneo; del ambassada chinese, que sollicitava le disinvitation de Tibet; e del autoritates german, qui difficultava le expedition de visas pro le jocatoris nordcypric.



Bandieras poco cognite: Cypro del Nord, Zanzibar, Groenlandia e Tibet, participantes del Cuppa Mundial ELF e del FIFI Wild Cup in 2006. ELF es un acronimo pro le lemma revolutionari “Equalitate, Libertate, Fraternitate”, e FIFI significa Federation International del Football Independente.

Le mesme anno, NF-Board organisava su prime Cuppa Mundial VIVA, que ab tunc se ha stabilite como le principal competition pro selectiones sin permission pro integrar FIFA. Ante un anno, Monaco decideva disaffiliar se, prohibite per su governmento de confrontar alcun adversarios e insatisfacte con le maniera como on conduceva le publicitate. In compensation, se accresceva le selectiones de Duo Sicilias e Scania, totalisante al momento trenta-quattro associatos.

Anno	Sede	Match final		
2006	 Occitania	Laponia	21-1	Monaco
2008	 Laponia	Padania	2-0	Arameos Syriac
2009	 Padania	Padania	2-0	Kurdistan
2010	 Gozo	Padania	1-0	Kurdistan
2012	 Kurdistan			

In le prime edition del Cuppa Mundial VIVA, 150 spectatores attendeva al victoria historic del equipa professional lapon sur le team monegasc. Le edition sequente haveva tamen un disputa feminin in que Laponia batteva Kurdistan. Le tertie se jocava in stadios importante del nord italian e haveva matches transmisses in vivo per le television. Le quarte edition esseva patrocinata per le Banca de Valetta e passava sin intromissiones del governmento maltese. In 2010, le NF-Board decideva realisar su mundial biennialmente e seligeva Kurdistan como proxime sede. Total, novem selectiones ha partecipate del torneo, e le padanos es su principal vincitor.

Le facto que iste selectiones organisa lor proprie torneos non vole dicer que illos non ha pugnate per acceptation inter le competitiones “official”. Lo que totes ha in commun es le irreductibile opposition de Espania, timente que alcun de su regiones autonome reclamara immediatamente lor officialisation si FIFA admitte le inclusion de selectiones subnational. Catalonia ha inviate regularmente su selection a campo a fin de propagar le desiro separatista del region. Galicia e le Pais Basc anque ha invitate membros de FIFA pro realisar matches amical. Le pression de Espania duceva FIFA a inventar un regula petree pro le admission de nove membros: pertiner al Naciones Unite. Como le statuto non retroage al federaciones ja acceptate, illo mitteva ancora plus pais in un categoria extraordinari, le membros “FIFA ma non ONU”, como Puerto Rico e le

Insulas Virgine Statounitese. Anque, le criterios imposita per le confederationes a vices es plus blande. Assi, Tuvalu disputa in Oceania le competition qualificatori al mundial de FIFA, ben que non sia eligibile.

Le minutias del bureaucratia crea situationes bizarre como lo de Reunion e Mayotte, duo insulas african in le Oceano Indic. Le prime es un *departamento* francese, dunque illo ha permission pro inscriber su clubs in le cuppa continental, concession que non se face al secunde perque illo es un *territorio* francese. Non obstante, le clubs e selectiones de ambe integra un federation regional includente ancora Madagascar, Comores, Mauritius e Seychelles, totes membros plen de FIFA. Illos joca tamben le Cuppa del Ultra Mar, competition organisate per le Federation Francese de Football in que participa tanto le dependencias como le territorios – Reunion, a proposito, vinceva le edition inaugural in 2008.



Le selection national kurde e le logomarca del quinte edition del Cuppa Mundial VIVA, que se disputara iste anno. Kurdistan ha un liga con tres divisiones, le principal de illos integrate per dece-sex clubs, e dispone de un stadio pro 25 mille fans in le urbe Erbil, ubi anque le selection iraqi ha disputate su matches official. Secundo le inspection realisate per le NF-Board, le stereotypos de povressa e violentia que on assigna a Iraq non se confirma in iste region, que offere plen conditiones de albergar un torneo international con usque duodece participantes.

Le maniera como FIFA tracta su interesses se nota ben in le caso de Kosovo. Le nation balkanic declarava su independentia in 2008 e es recognite per circa novanta pais, inter le quales tote le Union Europee, a exception de Espania e altere quatro pais que time le separatismo in lor proprie territorio. FIFA permette que le jocatoros kosovar se transfere liberemente a clubs estranier e disputa competitiones official representante los, ma les prohibe representar lor selection national. Le imposition es que, ante que Kosovo obtene affiliation al Naciones Unite, su team non ha autorisation pro disputar ni mesmo matches amical. Altere nation in simile situation es Gibraltar: su natatores, boxers, triathletas e rematores pote representar lo internationalmente, ma non su footballistas, perque Espania ancora ha pretensiones sur su territorio.



Kosovo, Monaco e Gibraltar ha pugnate per lor inclusion in FIFA. Le ultime conta inter su glorias le conquista del Jocos Insular in 2007 post un victoria 4-0 sur Rhodes e le participation in le Torneo del Quatro Naciones in 2008, quando illo confrontava Anglaterra, Scotia e le Pais de Galles. Le ultime martio, le equipa batteva le Insulas Feroe 3-0 in un match amical.

Durante que parvitate politic bloca le participation de tante populos, le popularitate del football va multo plus lontan que le brancas de FIFA. Un pais in que illo ha trovate plus e plus adeptos recentemente es, qui lo dicerea, Vaticano. Le pappas Johannes Paulo II jocava como goalkeeper durante su juventute, e Benedicto XVI es un ardorose incitator de Bayern München. Plus, le pontifices vide in le sport un vehiculo pro propagar valores como solidaritate e fraternitate. Le Vaticano emphatisa multo le ethica in le football, e se manifesta contrari a certe decisiones como matches fixate pro le hora del prandio dominical con le objective de augmentar le receptas televisive. Totevia, le Sancte Sede non solo se involve in debattos footballistic, como tamben practica le sport. Vaticano ha su selection national e ancora su liga. Disputate annualmente ab 2007, le Cuppa Clericus habeva dece-sex participantes le ultime saison. Le equipas representa collegios de seminaristas con sede in Roma e include juvenes de plus que sexanta pais. Post un phase qualificatori, le octo melior equipas joca matches eliminatori que ha instigate grande rivalitate. Le collegio Redemptoris Mater attingeva le final del quatro editiones initial e conquireva tres titulos de campion, ganiante assi un fan club plus expressive que su rivales. Le anno passate, tamen, Universitate Gregorian altiava le cuppa post un victoria 3-1 contra Universitate Thomas de Aquino. Ben que amateur, le liga ha attracte le copertura de alcun jornales sportive in Italia e altere pais – le edition russe de *Newsweek* face un referentia jocose al fans como “credentes”. Libere de FIFA, le campionato ha introducte nove regulas. Le carta blau, per exemplo, exclude per cinque minutas le jocator que ha commisse un falta dur. Incantate con iste nova, reporters anglese lo ha supernominate *the sin bin* o ‘le cassa del peccato’.

Le selection statal vatican ha essite minus active al momento. Illo ancora non ha participate de un torneo e su match le plus recente esseva un defeat 1-2 ante Monaco in maio 2011. Le squadra es formate per guardas suisse, le unicos que ha permission pro acquirir citania vatican.



Ben que non admisse in FIFA ni in UEFA, le selectiones de Galicia, Pais Basc e Catalonia ha permission official pro disputar matches amical. Post septanta-cinque annos de inactivitate, Galicia ha facte septe matches ab 2005, inclusive con victorias contra Uruguay, Iran e Palestina; le ultime decembre, on batteva Sahara Occidental per 2-1. Le Pais Basc veniva de victorias sur Venezuela e Estonia, ma al fin del ultime anno perdeva 0-2 de Tunisia. Catalonia disputava circa duo centos matches ab 1904, ci incluse teams de prime linea como Francia, Argentina, Brasil e le proprie Espania. Excepto per duo matches contra le Pais Basc, le catalanos ha confrontate exclusivemente selectiones national ab 1997, summante 10 victorias, 3 equalisationes e 4 defaits. Ab 2009, sub le trainer Johan Cruyff, *La Selecció* faceva 4-2 sur Argentina, 4-0 contra Honduras e 0-0 con Tunisia. Inter 1901 e 1940, le federation catalan organisava su proprie liga, habente Barcelona e Espanyol como principal campiones.

Durante que Espania menacia abandonar le competitiones si FIFA accepta Gibraltar, Grande Britannia travalia a fin que su dependentias participa in torneos international. Le prime ha le appoio de Russia e Serbia a causa de lor ambitiones sur Chechenia e Kosovo. Le secunde conta sur le sympathia de Francia e Nederland, que tamben desira vider lor territorios e ex-colonias integrate al scenario sportive mundial. Il es difficile imaginar qual latere ganiara iste disputa, que debe allongar se per plure annos ancora, ja que FIFA demonstra poc voluntate de compromitter se con un o con altere.

Le anno passate, durante le crise ethic sur le denuncias de corruption involvente tante dirigentes, Anglaterra menaciava abandonar le entitate. Immediatemente Scotia annunciava que, in tal caso, lo accompagniarea. Si illo vermente occurrera un die – un hypothese remote, date le interesses pecuniari in joco – certamente Catalonia se animarea a formar con illos un nove confederation que continerea inter su clubs eterne rivales como Rangers e Celtic e grande fortias como Barcelona e Manchester United. Un initio promissor, nonne?



Uniformes e symbols del selectiones Rapa Nui, Quechua, Mapuche, Aimara, Guarany e Fernando de Noronha, alcun del equipas integrante le CSANF (Consilio Sudamerican de Nove Federationes), le branca sudamerican del NF-Board. Ora on travalia pro formar un association includente nationes de Nord- e Centroamerica, le Caribe e le Arctico.

Si illes joca, per que nos non lo pote?

“Si illes joca, per que nos non lo pote? Si joca le Pais de Galles, allora per que non Jersey? Si Hong Kong e Macau lo pote, allora per que non Tibet? Si Bermuda joca, dunque per que non Guernsey? E per que non Gibraltar, si le Insulas Cayman sí? E per que non Groenlandia, si le Insulas Feroe lo pote?”

Extracte de un conferentia per le jornalista Steve Menary, autor de *Outcasts! The lands that FIFA forgot*. Su conferentia complete, presentate in 2005 in Copenhagen, pote discargar se in formato pdf al adresse http://www.playthegame.org/upload//Steve_Menary_-_When_Is_a_National_Team_not_a_National_Team.pdf, in anglese.

Como va Filettino?

In le edition numero 24, de octobre 2011, on reportava le desiro del burgomaestre de Filettino de que su urbe deveni independente de Italia. A lo que pare, le pretension non ha essite prise in serio per le autoritates italian. Totevia, le sito del principato seque active. Qui lo visita trova le annuncio *On cerca un principe pro Filettino*; le notitia *Le Principato de Filettino va subito al guerra del aqua*; e offertas de hoteles e altere productos relative al urbe. O melior, al principato.



Camisetta offerte in le sito www.principatodifilettino.eu.

Que Deo salva le monarchas!

Duo notitias sur monarchas ha attracte le attention del gente le ultime mense.

Le 18 februario, le imperator Akihito se submitteva a un chirurgia cardiac. Le monarcha japonese, con 78 annos de etate, se ha recuperate del operation. Su regno comenciava in 1989 e post su conclusion, secundo le usage japonese, recipera le designation de era Heisei. Japon es le ultime pais del mundo a denominar se *imperio*, assi mesmo solmente per tradition. In senso stricte, iste parola se applica a nationes cuje politica consiste in expande lor dominio per le conquista de altere populos – exemplos es le imperios Roman, Ottoman, Russe e Britannic. De iste acception veni le adjectivo *imperialista*.

Le 6 februario, Elizabeth II compleva sexanta annos como regina del Regno Unite e del Communitate Britannic. Quando illa esseva coronate, Pio XII esseva le pappo e Winston Churchill le prime-ministro britannic. Hodie, al 85 annos, illa es le sol monarcha britannic cognite per 90 per cento del humanitate e es un del facies le plus recognite in le mundo. Al momento, Elizabeth – qui decideva conservar su nomine baptismal post le coronation – solo non ha regnate plus longemente que le regina Victoria, cuje era durava de 1837 a 1901.

Majoritarimente republican, le mundo hodie associa le reges e lor familias al historias feeric, dante grande attention a matrimonios e altere celebrationes palatian. Ubi le monarchas ancora regna, systemas parlamentarista face que illes, le plus sovente, non passa de figuras ornamental, exempte de prender decisiones e, in le caso britannic, mesmo de emitter opiniones politic. Assi, Elizabeth ha ganiate un condition immaculate, un aura sacre e maternal que la converte in regina non solo del britannicos, ma de quasi tote le populos.

In Lettonia se parla letton

Un referendum realisate le 18 februario in Lettonia decideva con 75 per cento de approbation que le russo non debe acceptar se como secunde lingua official del pais. Le pais baltic ha 2 milliones de habitantes, 600 mille del quales ha le russo como lingua native. Le medietate de iste gruppo non poteva votar in le referendum perque non ha citania letton, lo que obviemente facilitava le victoria del opposition.

Sub domination tsarista, Lettonia passava per un forte processo de russification. Le massive migrationes habeva per finalitate reducir le animo nationalist del lettones. Durante le periodo independente de 1918 a 1940, le russos habeva le directos usualmente concesse al minorias ethnic in statos democratic. Totevia, non plus que 15 per cento de illes apprendeva le letton. Con le invasion sovietic, le politica migratori se reprende, a puncto que le russos supera le lettones in alcun urbes importante. Post le restablimento del independentia in 1991, le citania non se ha concesse automaticamente como antea, ma depende de un test de cognoscentia sur le lingua e le historia national, assi que multe russophonos ancora ha status de residentes estranier.

Le leges letton protege le quasi extincte livonio, lingua indigena minoritari pertinente al familia uralian. In le scholas, le lettones debe aprender le lingua patrie e le anglese, con le germano o le russo como option de tertie lingua. Le ultime annos, le anglese ha ganiate projection como lingua commercial e touristic.

Le Almanac in le sito de UMI

Per iniciativa de Thomas Breinstrup, le Almanac pote descargar se ora tamben in le sito del Union Mundial pro Interlingua, al adresse www.interlingua.com/almanac.

Nostre blog continua in activitate, totevia. In ambe paginas, on ha accesso a tote le editiones passate. Le edition currente continua exclusive pro celles que lo ha sollicitate al editor per e-posta. Le adhesion al Almanac es gratuite.